



Protocol dalla radunonza communal Lumnezia (2015/03)

Datum: Venderdis, ils 14 d'uost 2015

Liug: Halla plurivalenta dalla casa da scola Sutvitg a Vella

Cuoz: 20:00 – 21:45 uras

Presents: 99 personas cun dretg da votar

Parsura: Duri Blumenthal, president communal

Actuara: Martina Caviezel, vicecanzlista

Tractandas

1. Avertura ed elecziun da dumbravuschs

Il president beneventa ils presents e constatescha che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia. La gliesta da tractandas dils 31 da fenadur 2015 vegn approvada.

Seperstgisai ein:

- Martin Capaul, commember dalla suprastonza communal Lumnezia
- Hilda Livers, commembra dalla cumissiun da gestiun Lumnezia

Sco dumbravuschs vegnan elegi:

- Ueli Caduff
- Alexander Casanova

2. Protocol dalla radunonza communal dils 12 da zercladur 2015 (2015/02)

Stefan Caduff ha inoltrau protesta enviars il protocol dils 12 da zercladur 2015 cun la pretensiun da cumpletar quel cun sias remarclas specificas sut varia davart il project dil stabiliment da recreaziun a Davos Munts. Tenor las leschas ch'ei relevantas per la vischnaunca Lumnezia han ils protocols da vegnir screts en romontsch ed els ston informar silmeins davart ils conclus. Consequentamein existan neginas obligaziuns da protocolar en detagl menziuns che crodan sut varia e perquei duei il recuors vegnir renvius.

Daniel Blumenthal sincerescha che la cumissiun da gestiun adempleschi sias obligaziuns da controlla davart il project a Davos Munts. Vinavon declara el ch'il rendaquen en detagl vegni presentaus a caschun d'ina proxima radunonza communal entras ils architects responsabels per il project.

La radunonza communal decida cun 40 encunter 3 vuschs da renviar il recuors da Stefan Caduff enviars il protocol 2015/02. Il protocol 2015/02 vegn approbaus cun 69 encunter 2 vuschs.

3. Midada dalla constituziun dalla vischnaunca Lumnezia

Strategia per las estructuras dalla suprastonza communal cun reducir il diember da commembers e midar il modus d'elecziun

Orientaziun

Las stipulaziuns el contract da fusiun prescrivan che la suprastonza communal dalla vischnaunca Lumnezia secumponi da nov commembers e ch'ils vischinadis hagian il dretg d'esser representai en suprastonza cun mintgamai in sez. Las experientschas fatgas entochen ussa muossan che quellas estructuras ein buca idealas per la vischnaunca Lumnezia. Perquei ei la suprastonza communal sefatschentada da rudien cun quei tema ed ha evaluau differents models che optimassen la movibladad e la trasparenza dil gremi e

che levgiassen ils commembers dalla suprastanza da lavurs operativas. Il model ideal pil futur prevesa ina suprastanza cun tschun departaments che seconcentrescha sin lavurs strategicas e vegn sustenida tenor basegns entras cumissions. Per exequir las lavurs operativas dueien las differentas spartas vegnir rinforzadas cun dapli personal, quei che havess era consequenzas finanzialas. La finamira fuss da midar las structuradas existentas sin la proxima perioda d'uffeci.

Il diember dils commembers dalla suprastanza duess vegnir reducius da nov sin tschun ed il modus d'elecziun havess da succeder senza clausula da representanza dils vischinadis. Per far las midadas drova ei ina adattaziun dalla constituziun communal.

Tenor posiziun dalla Regenza dil cantun Grischun ei il contract da fusiun ligionts e duess buca vegnir midaus cuort suenter la fusiun. La resca ch'ei vegni inoltrau recuors encunter ina revisiun dalla constituziun communal vegn taxada sco considerabla. La suprastanza communal ei denton dall'opiniun ch'ina clara decisiun democratica dalla vischnaunca Lumnezia per far la midada stuessi era vegnir respectada ed acceptada dalla Regenza.

Discussiun

Tenor ils votums ord il miez dalla radunonza, vegn l'idea da reducir la suprastanza da nov sin tschun commembers beneventada grondamein. Tier il modus d'elecziun sedifferenzieschan ils meinis.

Decisiun

La radunonza communal decide en ina votaziun consultativa cun 91 encunter 0 vuschs da surdar alla suprastanza communal per mauns dalla radunonza communal e dalla votaziun all'urna l'incarica da sviluppar ina strategia per schaffir structuradas novas cun reducir il diember dils commembers dalla suprastanza da nov sin tschun.

4. Fixar ina quota unitara ella vischnaunca da Lumnezia per igl acquist d'immobillas entras persunas digl exterior

Orientaziun

La lescha federala davart igl acquist da bains immobigliars tras persunas digl exterior (LAIE) e la lescha introductiva dil cantun Grischun reglan ils contingents per las lubientschas d'acquistar appartaments da vacanzas ed unitads da habitaziuns en in apparthotel e la distribuziun da lubientschas. Las vischnauncas san fixar ulteriuras restricziuns leutier. Enteifer la vischnaunca Lumnezia existan talas restricziuns sulettamein per il vischinadi da Vella.

Proposta

La suprastanza communal propona da harmonisar igl uorden enten slijar las restricziuns dil vischinadi da Vella.

Decisiun

La radunonza communal decide cun gronda maioritad d'abolir las restricziuns e fixescha la quota procentuala maximala per l'entira vischnaunca a 100%.

5. Approbaziun dils statuts per il Circuit dil register funsil Glion – Lumnezia

Orientaziun

Ils statuts vertents dil Circuit dil register funsil Glion-Lumnezia valan dapi igl onn 1996. El decuors dils onns vargai ein vegnidas realisadas las fusiuns dallas vischnauncas Mundaun, Stussavgia, Lumnezia, Ilanz/Glion e Val. Cheutras ei il diember da vischnauncas el Circuit dil register funsil Glion-Lumnezia sereducius da 32 a 10. Suenter la fusiun dallas vischnauncas Sursaiassa e Mundaun, che va en vigur l'entschatta 2016, cumpeggia il Circuit dil register funsil Glion – Lumnezia mo pli 9 vischnauncas.

Cun ils novs statuts vegn la radunonza da delegai remplazzada entras la conferenza da presidents e corrispunda allas estructuras dalla refuorma territoriala el cantun Grischun. La sedia sesanfla ella vischnaunca Ilanz/Glion cun in biro. A Vella vegn ina filiala menada. La midada dils statuts duei entrar en vigur legala igl 1. da schaner 2016.

Il menader dil register funsil a Vella, Ueli Caduff, declara ch'ins hagi saviu salvar il biro a Vella grazia ad in act solidaric dil cumin e dallas vischnauncas dalla Lumnezia. Vinavon fa el menziun ch'igl uffeci funsil Glion-Lumnezia hagi generau entochen ussa pulitas summas da gudogn ord il menaschi, las qualas vegnan repartidas sin las vischnauncas cumpigliadas. Da quei ha era la Lumnezia saviu profitar el decuors dils onns vargai. Egl avegnir vegn la summa a sereducir muort la digren dallas midadas da maun.

Decisiun

La radunonza communal aprobescha unanimamein ils statuts per il Circuit dil register funsil Glion – Lumnezia.

6. Credit da CHF 450'000 per l'installaziun da dumbraders d'aua

Orientaziun

Tenor la lescha davart il provediment d'aua che la vischnaunca Lumnezia ha approbau all'urna ils 14/06/2015 e che va en vigur per igl 1. da schaner 2016, ha mintga retratga d'aua da principi da cuorer sur in dumbrader d'aua. En l'emprema fasa eis ei previu d'installar dumbraders vid tut ils objects ch'ei colligai cul provediment d'aua ed han aunc negin dumbrader. Ils pertuccai vegnan informai cun in scriber persunal ed han la pusseivladad da prender posiziun. Las lavurs succedan el decuors digl atun 2015.

Tier las investiziuns settracta ei da ca. 700 dumbraders cun modul da func e las lavurs d'installaziun leutier. Las lavurs d'installaziun vegnan repartidas sin las fatschentas sanitaras cun sedia ella vischnaunca Lumnezia, las qualas ein sedeclaradas promtas da far la lavur tenor las cundiziuns fixadas dalla suprastonza communal. La summa per la cumpra digl indrez munta a CHF 210'000, per las lavurs ed il material d'installaziun vegn calculau cun CHF 231'000. La summa da reserva importa CHF 9'000.

Decisiun

La radunonza communal conceda il credit da CHF 450'000 per l'installaziun da dumbraders d'aua cun 80 encunter 3 vuschs.

7. Rendaquen dil project per il plaz public Palius a Vella

Orientaziun

La radunonza communal dils 07/06/2015 haveva concediu in credit da CHF 690'000 per realisar in baghetg da menaschi ed in plaz da recreaziun a Vella/Palius. Ils cuosts effectivs per realisar il plaz ed il baghetg muntan a rodond 652'000 francs. Ils cuosts per la fontauna Toni Halter ein vegni finanziaj entras la fundaziun da cultura Lumnezia. Perencunter ha la vischnaunca contribuui CHF 14'800 en favur dallas festivitads per la commemoraziun da Toni Halter. L'Uniun piazza da giugs Vella ha surdau alla vischnaunca la summa da CHF 19'504, la quala vegn scretta dabien al project.

Decisiun

Il rendaquen dil project per il plaz public Palius a Vella vegn approbaus unanimamein.

8. Orientaziuns

- 1) L'interpresa 7132 Vals AG vulesc prender a tscheins plirs plazs el vischinadi da Suraua per setschentar cun helicopter. Per astgar setschentar sin in plaz extern tonscha il consentiment dil possessur dil plaz senza ch'ei drova ina lubientscha dalla vischnaunca. La vischnaunca ei denton tangada cun vias d'access che han scamond da carrar e fussen necessarias per contonscher ils plazs cun vehichels. Sin fundament da numerus resuns negativs dalla

popolaziun indigena, ha la suprastonza communal communicau all'interpresa interessada che la vischnaunca mantegni ils scamonds da carrar existents e declarau ch'ella seigi era buca promta da schar a tscheins localitads communalas el vischinadi da Suraua en quei connex. Alla suprastonza communal vegn mess a pèz da sclarir vinavon las pusseivladads che seigien dadas alla vischnaunca per evitar il traffic turistic cun helicopter.

- 2) Dils consuments d'electricidad a Suraua ei vegniu incassau per ils onns 2013 e 2014 nungustificadamein importos per diever da terren public. Las summas vegnan restituidas als consuments pertuccai.
- 3) Ils acts per ina revisiun parziala dalla planisaziun locala Lumnezia sesanflan tier igl uffeci da planisaziun dil cantun Grischun per examinaziun. La revisiun pertucca adattaziuns da zonas da baghegiar. Cun la revisiun dalla lescha federala dil territori ston enzonaziuns novas vegnir compensadas cun exxonaziuns. La revisiun totala dalla planisaziun locala ei pil mument negin tema, essend che quella vegn ad haver per consequenza ina redimensiun dallas reservas dallas zonas da baghegiar existents.
- 4) Per segirar meglier las sendas da viandar enteifer la Lumnezia encunter prighels entras biestga, vegn sclariu sch'ei drova mesiras per remeduras per liung dallas sendas da viandar. Vinavon dueien ils responsabels per las alps vegnir sensibilisai per quei tema.

9. Varia

Toni Arpagaus fa attent che las bandieras officialas vid las petgas sil plaz Cadruvi a Cumbel seigien vegnidas allontanadas senza remplazzar quellas.

Vella, ils 14 d'uost 2015

Il president:

L'actuara:

Duri Blumenthal

Martina Caviezel